

# TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

*“E ao to'na, e te mo'a, to te noaa ia'na te tia-faahou-raa matamua ra; e ore roa te piti o te pohe e tiaia no mai i te reira: e riro râ ratou ei tahu'a na te Atua e na te Mesia, e e hau to ratou ia'na ra e ia hoê tausani i te matahiti.”*  
*Apokalupo 20: 6.*

Nu. 8.

10 Me, 1911.

Mat. 4.

## No Te Tia-Faahou-Raa.

(TUATIRAA.)

**T**E vai ra te tahi tia-faahou-raa hanahana rahi, e e tupu mai ai i te faraa piti mai o to tatou Fatu ra o Iesu Mesia. E te feia faaroo i pohe na i roto i te area i ropu i te poheraa o te Mesia e i te piti o to'na taeraa mai e faatia-faahou-hia'i i to ratou mau tino i nia e tia'i mai te pohe mai i taua mahana ra, e e ora faahou mai ai mai tei mutaaihora. Mai tei papaihia ra e, o te Fatu iho hoi te pou mai mai te ra'i mai, e te feia i pohe i roto i te Mesia ra, o te tia mai na ia i nia. E muri a'era, o tatou o te feia ora e toe ra, e ravea-atoa-hia mai ia e ratou atoa ra i reira, i nia i roto i te ata, ia farerei atu i te Fatu i roto i te reva nei ra; a parahi mau atu ai tatou i pihai-atoa-iho i te Fatu e a muri noa'tu. Tesalo Hoê 4: 16, 17. Hoê â te haapiiraa a te peropheta ra o Iosepha Semita, ua na ô maira oia e, I mua'tu i to te Fatu faatoparaa i to'na rima e faaoto mai te hoê melahi i ta'na pu, e te feia mo'a o tei taoto ra, e tia



mai ia e farerei ia'na i roto i te ata. B. F. S. 45: 7. Ua haapii atoa mai te peropheta Iosepha e e faaora e e faatia i nia te mau nunaa Etene o te pohe na ma te ite ore i te ture, e te evanelia, ia tae faahou mai Iesu ra. Na ô hoi te taio-raa. I reira hci te mau nunaa Etene ra e faaorahia'i, e te feia aore ratou i ite i te ture ra e tufaa atoa i te tia-faahou-raa matamua ra. B. F. S. 45: 10. E e mea tia roa ia faatiahia te mau nunaa Etene ra i nia mai te pohe maira i roto i te tia-faahou-raa o te feia parau-tia ia tae mai te Fatu ra, no te mea e e feia ite ore ratou, e no reira e feia hara ore ratou, mai te papaihia e Paulo e, "E ore râ te hara e haapaohia i te ture ore, e aore e ture, aore atoa ia e hara." Teie atoa mai ia te haapiiraa a te peropheta no te feia e vai ora noa i nia i te fenua nei ia tae mai te Mesia. "E te feia mo'a o te vai i nia i te fenua nei, o tei vai ora e faaana-anaeahia ia, e e tahitihia i nia ia faafarerei atu ia'na. E te feia o tei taoto i roto i to ratou mau apoo, e tia mai ia i nia; e amaha hoi to ratou mau menema e e tahiti-atoa-hia ratou i nia ia farerei atu ia'na i ropu i te pou no te ra'i, no te Mesia hoi ratou o te oho matamua o ratou, o ratou na te pou atoa mai e oia atoa ra, e o ratou atoa o te vai i te fenua nei e i roto i to ratou mau apoo, o ratou atoa ra te pee na i nia ia farerei atu ia'na; e na te pu a te melahi a te Atua te reira atoa ra e faatupu. B. F. S. 85: 27. O tei pohe i roto i te mileniamia, e ore e taoto i raro i te repo, e faahuru-ê-hia oia mai te amuraa mata ra. Mai te papaihia ra e Paulo. Inaha e faaite atu vau ia outou i te parau aro; eita tatou e hope i te taoto e hope râ tatou i te faahuru-ê-hia. Kor. Hoê 15: 51. E hoê â te haapiiraa a Iosepha, a na ô ai ra e. Ei taua mahana aore hoi e mihi-faahou-raa i reira, no te mea ua ore te pohe. Ia tae i te reira tau e ore te aruaru e pohe e ia ruau noa'tu oia, e au hoi to'na oraraa no te tumu raau ra, e ia pohe oia ra, e ore oia e taoto, oia hoi i raro i te repo, e faahuru-ê-hia ra oia mai te amuraa



mata ra. B. F. S. 98: 5. Te tia-faahou-raa ia hope na matahiti hoê tausani. Area te tahi pae o te feia i pohe ra, ia hope taua na matahiti hoê tausani ra, i ora faahou ai. Apo. 20: 5. Ei reira e faaoto faahou mai â hoi te hoê pu o te toru ia no te pu, ei reira e tia mai ai te mau varua taata o te haavahia, e o te faahapahia, e o te tahi pae teie o tei pohe, e ore roa hoi ratou e ora faahou mai e ia hope te matahiti hoê tausani ra, e ore hoi e tae noa'tu i te hopea no te ao nei. B. F. S. 85: 29. Ia hope râ na matahiti hoê tausani ei reira e tupu mai ai te tia-faahou-raa hopea ra. Ua papu i roto i te mau parau mo'a i papaihia ra e, o te feia atoa ra tei faatiahia i nia mai te pohe mai, e aore ra o tei faahuru-ê-hia i roto i te mileniama e tufaa ta ratou i roto i te tia-faahou-raa matamua ra. E a muri atu i te reira e tupu mai ai te tia-faahou-raa hopea ra. E ao to'na, e te mo'a, to te noaa ia'na te tia-faahou-raa matamua ra, e ore roa te piti o te pohe e tiaia no mai i te reira; e riro râ ratou ei tahu'a na te Atua, e na te Mesia, e e hau to ratou ia'na ra e ia hoê tausani i te matahiti. Apo. 20: 6. O vai ra te feia e faatiahia i roto i te tia-faahou-raa hopea ra? Teie hoi ratou, e i te hopea roa nei, e ore ratou atoa ra e amuihia i roto i te amuiraa no te feia mo'a o te tahitihia i nia i te ekalesia no te Matahiapo, o te fariihia mai i roto i te ata; o ratou teie o te feia haavare, te tahutahu, e te faaturi e o te tapea i te vahine faaturi ra; e o te hinaaro e o tei faatupu i te haavare ra; o ratou teie o te farii i te riri no te Atua i nia i te fenua nei, o ratou teie o tei ite i te puai no te auahi mure ore; o ratou teie o tei hurihia i raro i te po, e o tei irihia i te riri no te Atua puai hope ra, e tae noa'tu i te hoperaa no te mau tau, e hope ai te mau enemy atoa i te haavîhia e te Mesia i raro a'e i ta'na avae, e ia faaotihia ta'na ohipa. B. F. S. 76: 7. "O ratou te feia e ore roa e ô mai i te vahi râ i parahihia e te Atua e te Mesia i te mau ao hopea ore ra."



Te Parau Tuatapapa no  
Iosepha Semita.

(TUATIRAA.)

PENE VIII.

MATAHITI 1829.

*Ua riro Olive Taudere ei papai parau na Iosepha. Te faa-  
ho'iraahia mai o te Autahu'araa o Aaron. Te mau  
bapetizoraa matamua. Te hamani maitai o Iosepha  
Naita raua o Petero Vitima.*

I TE 5 no Eperera i te matahiti 1829, ua tae mai te taata  
ra o Olive Taudere i te utua fare no Iosepha, e o tei  
reira to raua farereiraa matamua. Ei reira to'na faaite-  
raa'tu ia Iosepha e ei orometua haapii tamarii oia e a rave  
noa'i i te ohipa no to'na ra toroa i ô te oire o Iosepha metua,  
ei reira to'na faaroora i te parau apî e, ua noaa Iosepha  
te mau api auro e no reira ua haere atu ra oia ia Iosepha e  
haapapu'i i taua parau ra. E piti mahana i muri a'e i te  
Olive taeraa'tu ia Iosepha, oia hoi, i te 7 no Eperera ua  
haamata faahou Iosepha i te iritiraa parau no te Buka a  
Moromona, e ua riro Olive ei papai parau na Iosepha. Ua  
faaite atu Olive ia Iosepha i teie nei parau, oia hoi, i muri  
a'e i to'na faaroora i te parau e ua noaa Iosepha te mau  
api auro e te feruri noa ra oia i te reira, aehuehu roa a'era  
to'na aau i taua parau ra, e ua pure oia i te Atua e faaite  
mai ia'na e e parau mau anei te reira. E ua na ô atura oia  
ia Iosepha ua faaite mai te Atua ia'na e e parau mau te reira  
tei faaroohia e a'na; area ua tapea noa oia i te reira i roto i  
to'na ihora aau e aore roa oia i faaite atu i te hoê taata.

*Te faaho'iraahia mai o te Autahu'araa o Aaron. Te  
rave noa ra raua i te ohipa iritiraa parau e tae noa'tu i te  
avae ra o Me, 1829. Ei reira ua haere raua i te vahi uru*



raau e pure e e ani atu i te Atua i te auraa no te baptizoraa ia matara te hara, no te mea hoi ua iteahia te reira parau e raua a iriti noa'i i te parau no nia i te mau api auro. A pure noa'i raua i te Atua, inaha ua fa mai te hoê melahi no te ra'i, tei roto oia i te tahi ata maramarama i te taeraa mai e ua tuu atu oia i ta'na pue rima i nia iho i to raua na upoo, i te na ôraa mai e:

*"Inia iho ia orua e ta'u na tataeae tavini, i te io'a o te Mesia, te tuu atu nei au i te Autahu'araa o Aarona tei mau i te taviri o te melahi tavini ra e te taviri hoi o te evanelia o te tatarahapa, e o te baptizo utuhiraa ia matara te hara, e e ore e rave-ê-hia teie i te femua nei e ia pûpû faahou te tamarîi tamaroa a Levi ra i te ô i te Atua ra ma te parautia."* B. F. Pene 13.

Ua faaite mai te melahi ia raua e, aore te mana i roto i te Autahu'araa o Aarona i te tuuraa rima no te horoaraa i te Varua Maitai; area ua parau mai oia e noaa ia raua te reira mana a muri atu. Ei reira ua faaue atu oia ia raua e haere ia baptizohia. Ua parau atu oia ia Iosepha ia baptizo oia ia Olive na mua, e na muri e baptizo Olive ia'na. Haere atura raua e ua baptizohia ihora. Ua baptizo atu Iosepha ia Olive na mua, e i muri a'e ua baptizohia Iosepha e Olive. E i oti a'era raua i te baptizohia ua tuu atu Iosepha i to'na pue rima i nia iho i te upoo o Olive e ua faatoroa ia'na i te Autahu'araa o Aarona. E i muri iho ua tuu atu Olive i ta'na pue rima i nia iho i te upoo o Iosepha e ua faatoroa ia'na i te Autahu'araa o Aarona; no te mea ua faauehia raua e te melahi ia na reira. Ua parau mai te melahi ra tei tae mai, e ua faatoroa ia raua i te Autahu'araa o Aarona i taua mahana ra, o Ioane to'na i'oa, oia hoi o tei parauhia o Ioane Baptizo i roto i te Faufaa Apî nei, e te rave ra oia i te ohipa i raro a'e i te faatereraa o Petero e o Iakobo e o Ioane, e tei ia ratou te taviri o te Autahu'araa o Melehizedeka, e ua parau mai oia e faatoroahia rauaitaua



Autahu'araa atoa e tia'i i te tau a muri atu, e ia parauhia o Iosepha te peresibutero matamua i roto i te ekalesia, e o Olive ra te piti ia. Tei te mahana 15 no Me i te matahiti 1829 i baptizohia e i faatoroahia'i ia raua i raro a'e i te rima o te melahi ra. E oti a'era raua i te baptizohia, haere maira raua i nia mai raro mai i te pape ra, inaha ua itea raua i te mau mea hanahana rahi mai ô mai i te Atua ra. E ia oti Olive i te papetizohia e Iosepha ua haere maira te Varua Maitai i nia iho ia'na, ei reira, tia a'era oia i nia, tohu ihora i te mau mea e rave rahi e fatata i te tupu. E ia oti Iosepha i te papetizohia e Olive, ua tae atoa mai te Varua tohu i nia iho ia'na, tia a'era oia i nia tohu ihora i te tupuraa o teie nei ekalesia e te ohipa a te Atua i rotopu i te tamarii a te taata nei, i a'era i te Varua Maitai, oaoa ihora raua apipiti atoa i te hamani maitai rahi a te Atua ra. I na mahana rii i muri iti a'e i to raua faatoroaraahia e to raua baptizoraahia, aore raua i faaite hua i te reira, no te mea te parahi noa ra te mau enemi e rave rahi i reira, e aore Iosepha i hinaaro ia ite ratou i te reira parau apî, no te mea, ua papu roa to'na mana'o e ia ite ratou i te reira e hamani ino faahou â ratou ia'na. E e haapeapea noa ratou i ta'na ohipa iritiraa parau êê, e te hinaaro ra oia ia faaoti oioi noa taua ohipa ra. I te reira tau mahana ua tae mai Samuela Semita te teina no Iosepha, e ua faaite atu raua ia'na i te ohipa apî maere rahi i faatupuhia e te Atua i rotopu i te tamarii a te taata nei. E ua haapii raua ia'na i te tahi mau parau no te Bibilia. E ua faaite atoa'tu raua ia'na i te parau i oti i te iritihia no nia i te mau api auro. E ua haapii maite atura raua ia'na i te parau no te evanelia o Iesu Mesia. Aore oia i farii oioi noa i ta raua mau haapiiraa ei haapiiraa parau mau. Area râ putapû atura to'na aau i taua mau parau i haapiihia'tu e raua ia'na. Muri a'era haere tia-atura oia i mua i te aro a te Atua, pure ihora, ani atura ma te aau haehaa e te feaa ore e parau mau anei tei haapiihia



mai? Ua tae mai te parau a te Atua ia'na ei parau mau taua mau parau i haapiihia mai, ei reira ua farii oia i ta raua mau haapiiraa. E i te mahana 25 no Me, 1829, ua papetizo Olive Taudere ia'na. E i oti a'era oia i te baptizohia i a'era oia i te Varua Mo'a e ua haere atu oia i te utuafare ma te arueraa'tu e te haamaitairaa'tu i te Atua mau.

I taua mau mahana ua tae mai te tahi taata paari o Iosepha Naita to'na i'oa ia Iosepha ma, no te mea e, ua faaroo a'enei oia i te ohipa i ravehia e Iosepha raua o Olive. Ei reira ua tupu te mana'o i roto ia'na e mea maitai ia afai atu oia i te maa ei tautururaa'tu ia raua. E e mea rahi tei afaihia mai e a'na. E ua fariihia te reira e raua ma te mauruuru e te popou rahi, no te mea aita rea ta raua maa e toe ra. E i muri a'e ua afai pinepine mai oia i te maa ei tauturu ia raua. O Iosepha Naita e taata aau horoa noa e te hamani maitai i te taata.

I muri a'e i to Iosepha haamataraa i te iritiraa i te parau êê no nia i te mau api auro, ua farerei oia i te tahi taata o Petero Vitima to'na i'oa e te tahi atu â mau fetii atoa no'na ra. Te parahi ra ratou i te oire ra o Faete (Fayette) i te mataeinaa ra o Seneca i te tufaa fenua rahi ra o Niu Ioka i Amerika. I te avae Tiunu ua tae mai te tahi taata o Davida Vitima te i'oa e tamaiti oia na Petero Vitima mai ô mai oia i te oire ra o Faete. Ua tonohia mai oia e ta'na metua tane e haere mai e parau atu ia Iosepha raua o Olive e haere atu raua i to'na fare parahi ai, e tae noa'tu i te taime e faaoti roa'i raua i te ohipa iritiraa parau êê no nia i te mau api auro. E ua parau atoa'tu oia ia raua eiaha e peapea noa'tu i te mana'o na nia i te maa e te mau haapaoraa i te pae au tino nei, na ratou te reira mau mea e horoa noa ia raua. Ua fariihia tei parauhia mai, haere atura i te oire ra o Faete, e ua parahi raua i ô te utuafare ra o Petero Vitima e tae noa'tu i te taime ua faaoti roa raua i te iritiraa parau êê no nia i te mau api auro. I te avae Tiunu ua baptizo Iosepha i to'na tuaana o Haeramu raua o Davida Vitima. E ua baptizo Olive i te taata ra o Petero Vitima iti. Mai reira'tu e rave rahi tei faaroo e ua baptizohia, e ua faaitoito noa Iosepha raua o Olive i te haapii e te a'o atu i te taata atoa ra.

—VILIAMU SETEMILA.

(E tuatihia mai teie parau.)



## Parau No Te Mau Toroa.

I ROTOPU i te mau haapaoraa a te taata e vai noa i roto i teie nei ao, te vai amahamaha noa nei â to ratou mau aratai, e te haapoiri nei hoi i te mana'o o te mau taata i nia iho i te mau tumu o te ekalesia ta Iesu Mesia i faatia i roto i teie nei ao a parahi ai oia i te ao nei.

Hoê noa iho ekalesia ta te Fatu i faatia i roto i teie nei ao, i teie nei râ ua hanere te ekalesia e vai nei, e ua na reirahia ia, ia imi te taata e teihea te ekalesia mau i faatihia e Iesu Mesia, e teihea te ekalesia i faatihia e te taata nei, o tei farii i te tahi pae o te parau a te Atua, e tei faarue i te tahi pae.

No reira te vai nei te mau tapao e rave rahi e itea'i te ekalesia mau a Iesu Mesia, eiaha râ e mana'o e, e papu te mana'o i te imiraa maori râ ia ore te tiaturi i te parau a te taata nei, e ia tamauhia te aau i nia i te parau a te Atua. E na te parau a te Atua e faaite papu mai i te mau tapao e iteahia'i ta'na ra ekalesia mau e taa ê roa'i te mau ekalesia a te taata nei. Ua haamau Iesu Mesia i te mau toroa i roto i ta'na ekalesia ei niu no te parau mau i te anotau hopea nei.

Ua tuu atura oia i te aposetolo i roto i te ekalesia o mua ia, e ua haamana atura ia ratou ia a'o haere i te evanelia e e faaora i te mau ma'i, e faatia i tei pohe, e tiavaru i te mau demoni, e mea horoa-noa-hia mai ta ratou, e e mea horoa noa hoi ratou. E mana rahi ta Iesu i horoa'tu ia ratou, e ua parau atura oia ia ratou e, o ta outou i haamau i raro nei, e haamau-atoa-hia ia i te ao. Mat. 18: 18.

Ua tuu atoa te Fatu i te peropheta i roto i ta'na ekalesia o te piti ia, ei hi'o e ei farii i te mau parau no ô mai i te Atua ei maramarama no to'na ekalesia, ia ite ratou i te hinaaro o te Atua, no te mea, ua mataro te Atua i te faaite i ta'na parau moe i to'na mau tavini i te mau peropheta. Amosa 3: 7. Ua na reira pinepine mai te Atua i te tau tahito ia Mose mâ e te vetahi atu â mau peropheta o ta'na i para-



parau mai, i te faaiteraa mai i to'na mau hinaaro ia ratou i tupu ai to ratou ite i to te Atua hinaaro i te taata nei. Oia atoa hoi i te anotau o te Fatu ua tuu oia i te peropheta i roto i ta'na ra ekalesia, e te na ô maira oia e. Eiaha e mana'o i haere mai au e faaore i te ture e te mau peropheta aore au i haere mai e faaore e faatia râ. Mataio 5: 17. No reira e te mau hoa no Te Heheuraa Apî, a hi'opoa maitai na outou i te huru o te haapiiraa a te Ekalesia a Iesu Mesia i te Feia Mo'a i te Mau Mahana Hopea Nei, e ta te bibilia faaiteraa i nia iho i teie nei mau tumu parau, ia ite tatou i te ekalesia mau a te Fatu i to'na tupuraa i nia iho i te parau mau, e na te reira e faaite mai ia tatou e, o te ekalesia, aore te peropheta i roto, e ere ia i te ekalesia a Iesu Mesia, na te taata râ. Korinetia Hoê 12: 28. Te vai atoa ra hoi i roto i te ekalesia a te Fatu te toroa tahu'a rahi. Hebera 5: 1.

E toroa hitu ahuru atoa hoi tei roto i te ekalesia a te Fatu, no te mea ua maiti mai oia ia ratou no roto mai i ta'na mau pipi ei hitu ahuru e ua ta toopiti atura hoi te Fatu i te tonoraa ia ratou na mua ia'na i te mau oire rii ta'na i mana'o e haere atoa oia, ua tuu atu hoi oia i te mana no ratou. Luka 10: 1-12. Tei roto atoa i te ekalesia a te Fatu te toroa episekopo, mai te faaitehia mai e Paulo. Timoteo Hoê 3: 1. Tito 1: 7.

Tei vai atoa ra hoi i roto i te ekalesia a te Fatu te toroa peresibutero. Petero Hoê 5: 1, 2. No reira te vai ama noa ra te lamepa a te ekalesia a te Fatu, no te mea te vai noa ra teie nei mau toroa i roto. Te parau maira o Paulo e, e ia haapaohia e raua te mau peresibutero no ratou i te mau ekalesia ma te pure e te haapaeraa maa. Ohipa 14: 23. E aore roa'tu hoi te bibilia i haapoiri noa'e i ta'na faaiteraa mai, ua faahuru-ê-hia râ te mana'o o te taata nei, i ore ai ratou i ite ai i te haapaoraa tia roa a te Fatu, no te mea ua anoinoi-noa-hia e ratou te parau a te Atua i ta te taata nei. Timoteo Piti 4: 3, 4.

Te vai atoa ra hoi i roto i te ekalesia a te Fatu, te toroa



tahu'a. Luka 1: 5. Te vai atoa ra hoi te toroa haapii i roto i te ekalesia a te Fatu. Korinetia Hoê 12: 28.

Oia atoa hoi te toroa diatono e te vetahi atu â mau toroa ua tuuhia ia i roto i ta'na ekalesia. Timoteo Hoê 3: 8. Philipi 1: 1. E teie nei ia ore tatou ia hi'opoa maitai i teie nei mau parau tumu, aore roa e iteahia te ekalesia mau a Iesu Mesia ta'na i faatia i to'na anotau.

E nafea ta tatou ravea e iteahia'i te ekalesia mau a Iesu Mesia i te anotau hopea nei? Teie ia ta tatou ravea e feruri rii maite ia to tatou mana'o i roto ia tatou iho e, i te anotau o Iesu Mesia ua faatia i ta'na ekalesia, e tuu Oia i te mau toroa i roto, e teie nei, ia ore taua mau toroa, oia hoi, te aposetolo, te peropheta, te haapii evanelia, te tahu'a rahi, te hitu ahuru, te episekopo, te peresebutero, te tahu'a, te haapii e te diatono i roto i te hoê ekalesia, e tapao papu roa ia e ere ia te ekalesia ta Iesu i faatia i rotopu i te taata nei, no te mea na'na iho i tuu ratou i roto i ta'na ra ekalesia. E e tia ia vai ia faaore atu? Eph. 4: 11-16. Kor. Hoê 12: 27-31. E i te anotau hopea nei tei roto i teihea ekalesia taua mau toroa i te anotau o te Fatu ra, ei reira a imi maite ai i roto i te mau haapaoraa atoa e vai i nia i te fenua nei, e ia itea'tu ra a hi'opoa maite hoi i ta'na mau haapiiraa i te au maite ra i ta Iesu Mesia e te mau haapaoraa i roto, ei reira oe e ite ai e o taua ekalesia mau ra ia a Iesu Mesia. E te feia e mataitai i Te Heheuraa Apî nei, a hi'o na râ, aore roa'tu Te Heheuraa Apî e haapoiri noa'tu i te mana'o o te taata, e aore hoi e faahepo noa'tu te haamaramarama maitai nei râ oia i te mana'o o te taata atoa e rave rahi, ia ite ratou i te hinaaro mau o Iesu Mesia i te taata nei ia riro tatou ei feia mo'a e te hapa ore i mua i te aro o te Atua, no reira ua tuu te Fatu i teie mau toroa i roto i ta'na ekalesia i to'na tau, ei aveia no ta'na ekalesia i te anotau hopea nei, ia faaauhia te feia mo'a i ta'na ohipa e orometua, e ia ta hoêhia te mana'o o te taata i te faaroo hoê i te Fatu ra ia Iesu Mesia.—M. a MAPUHI.



## Te Mau Parau Api.

I TE avae Eperera i te oire rahi ra o Niu Ioka, i Amerika, ua pau te tahi fare rahi i te auahi, e ua pohe roa 144 taata rave ohipa i roto.

I roto i te hoê oire i Amerika, ua patuhia te tahi fare rahi hamaniiraa paura. E toru pereoo i i te paura i reira, e ua haruru, e ua mou roa, e na te reira haruru e hamani ino i te mau fare o te oire. E e rave rahi te taata tei pohe. Ua aueuehia te fenua e 50 maile i te atea.

Mai te 17 no Novema e tae roa i teie nei â ua vai noa ra te peapea rahi orure hau i te fenua Mexico, i Amerika. Ua pehi a'enei te orure hau i te fare o te peresideni i te ofai, aita ratou i hinaaro ia Diaz ei perisideni no ratou. Te parahi nei te taata Amerika e rave rahi i te fenua Mexico. No reira ua tono atura te hau Amerika 20,000 faehau i te otia fenua, ei tia e ei paruru i ta'na mau taata peneiae ia roohia ratou i te hamini ino.

I te 29 no Mati ua ama te fare rahi faatere hau no te oire rahi ra o Albany, i te fenua Niu Ioka, i Amerika. E e rave rahi te mau piha e te mau buka faufaa rahi roa ua pau. E fare rahi roa e te nehenehe hoi. Teie te rahi o te moni i pau i to'na hamaniiraahia, oia hoi 27,000,000 dara. Aita taua fare ra i pau roa i te auahi, area e rave rahi te mau piha e te mau mea i roto ua pau. Teie te moni e au no te mau mea ua pau i roto ia'na, oia hoi e 7,000,000 dara.

Ua haere a'enei te arii no Rusia, i Europa, e te arii vahine atoa ei farerei i te Emepera no Purutia, e tuaana oia no taua arii vahine no Rusia. I to raua tereraa'tu i te fenua Purutia ua paruruhia te pereoo auahi e te mau faehau 100,000. E te fare ta raua i faaeahia'i, ua tia maite-hia e te nuu faehau, no te mea māta'u ihora ratou o te taparahihia te arii e te mau taata Rusia patoiraa hau, no te mea e rave rahi te mau taata Rusia tei ore e au i te hau e o tei opua e tei titau noa te arii e taparahi.

Tei roto i te fare ma'i no te ekalesia i te oire Roto Miti te tahi machine hi'o ivi, e te mau melo atoa e hope roa i roto i te tino taata nei. Ia afaihia te taata ma'i ivi, e aore ra i te tahi ma'i taa ore, ei reira e rave ratou i taua machine o tei parauhia x-ray e ia hi'o ratou i to'na ma'i noa'tu i te vairaa, tei te mafatu e taa ia, tei te roro e taa ia, e ore roa te tahi vahi i roto i te tino taatoa ra, tei ore e taea te mata ia hi'ohia e ratou. Te rave nei taua ohipa ra na roto i te tahi ravea uira, e i reira e nenei atoa ratou i te hoho'a no taua ma'i tei roto i te taata tei ma'ihia, e ia hi'opoahia te reira e te taote ei reira e taa maitai ai ia'na i te huru no taua ma'i, ei reira e imi oia i te raau e au ai. E ravea maere rahi hoi te reira. Teie te hoo no taua machine, oia hoi, 1,750 dara.



Teie te tau auhune anani i Tarafonia. E e rave rahi tei faaapuhia, e e faaapu faufaa rahi roa te reira. Ua faatomo e ua haponohia e te tahi mataeinaa 298 pereoo auahi anani ana'e i roto i te hebetoma hoê i te avae Eperera i mairi a'enei.

Haere atura te tahi taata moni rahi no Amerika o B. Widener to'na i'oa i te fenua ra o Beritani. E i reira ua hoo oia i te tahi hoho'a i parauhia te hoho'a faufaa rahi te reira i te mau hoho'a i te fenua Beritani. E teie te moni ta'na i horoa no taua hoho'a ra, oia hoi 500,000 dara.

I te avae Eperera te haere ra te taata ra o Al Hilton i nia i te mou'a i te tufaa fenua ra i parauhia Colorado, i Amerika. E inaha hoi ua auauhia oia e te tahi nana luko taehae. Te imi haere noa ra oia i ta'na na puaa-horofenua i moe na, a roohia mai ai i taua mau luko taehae ra. Uana'tura to'na hororaa, ei reira roohia'tu oia i te tahi taata i nia i ta'na pereoo. E taata tupai puaatoro, e te vai noa ra te tahi puaatoro tupai-api-hia i roto i te pereoo. Ei reira taora atura raua i te tahi vaehaa rahi puaatoro i te mau taehae tei auau ia raua. E i reira faaea ihora te mau luko, amu ihora ratou i taua puaatoro ra. Riro'tura taua puaatoro ra ei ora no taua na taata ra.

Te vai nei i te fenua Utaha, i Amerika, te tahi manu rii itoito amu matie. E i na matahiti e piti i mairi a'enei e rave rahi roa te mau faaapu matie ua pau ia'na. Riro'tura te reira e tumu peapea rahi na te mau taata faaapu, no te mea ei maa te reira matie na te mau puaa. E e faaapu faufaa rahi roa ia. Area i na matahiti i mairi a'enei ua tausani i te tausani tani matie ua pau i te amuhia e taua manu ra. Ua imi noa ra te mau taata faaapu te ravea e haapau ia'na, aita râ i iteahia. Muri a'era ua faaite atu ratou i te hau i te huru o taua manu peapea rahi. Ei reira ua faaue mai te hau i te tahi taata paari e haere i reira ia hi'opoa i taua manu ra e ia imi hoi te ravea e pohe ai, e ua na reira oia. Ua imi haere te taata no te hau i te tahi manu ei amu i taua manu amu matie, e ua iteahia, tei Italia, i Europa, te vahi i iteahia'i. Rave ihora taua manu ra, e ua afaihia i te fenua ra o Utaha. E te tuu nei ratou i taua manu amu manu ia pau te manu ino i te amuhia e a'na. Mai te mea e pau taua manu ra i te amuhia e tupu te mauruuru no te mau taata faaapu i te rahiraa.

---

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.